

四庫全書

集部

欽定四庫全書

御定佩文齋詠物詩選卷五十八

金山類

附焦山

五言律

金山寺

唐

張祜

一宿金山寺微茫水國分
僧歸夜船月龍出曉堂雲樹
影中流見鐘聲兩岸聞
因悲在城市終日醉醺醺

題金山

唐

孫魴

萬古波心寺金山名日新天多賸得月地少不生塵過
櫓妨僧定驚濤濺佛身誰言張處士題後更無人

題金山

唐
韓 垂

靈山一峰秀岌然殊衆山根盤大江底影挿浮雲間雷
霆常間作風雨時往還象外懸清影千載常躋攀

金山寺

宋
梅堯臣

吳客獨來後楚橈歸夕曛山形無地接寺界與波分巢
鶻寧窺物馴鷗自作羣老僧忘歲月石上看江雲

登金山

明周詩

絕島中流出蓮宮
匝杳茫谷雲通北固
津樹隔維揚海色朝
看近江聲夜聽長
獨憐臨眺者千古逝
湯湯

七言律

宿題金山寺

唐劉滄

一點青山翠色危
雲巖不掩與星期
海門煙樹潮歸後
江面山樓月照時
獨鶴唳空秋露下
高僧入定夜猿知
蕭疎水木清鐘梵
顚氣寒光動石池

遊金山

元薩都拉

約客同遊買渡船閒觀古刹禮金仙
山中好景無多地天下知名第一泉
佛閣齊雲浮海嶼客帆過寺帶風煙
當年郭璞因何事留與江心作浪傳

登金山吞海亭了公請賦

元張翥

危亭突兀戴鰲頭俯視滄溟一勺浮
龍伯衣冠藏下府梵王臺殿起中流
扶桑夜色三山日灩澦江聲萬里秋
老我惜無吞海句但磨崖石記曾遊

金焦兩山

元
周
權

海瞰紅處謁仙山
不管剛風客權寒
一鑑寒光開玉匣
兩螺青黛落銀盤
天低塔影攬雲聳
地窄鐘聲度水寬
却羨禪心如止水
任教四面自波瀾

金山寺

元陳孚

萬頃天光俯可吞。壺中別有小乾坤。雲侵塔影橫江口。
潮送鐘聲過海門。僧榻夜隨鮫室湧。佛燈秋隔蜃樓昏。
年年只有中泠水。不受人間一點渾。

遊金山寺

元 周伯琦

江心一簇翠芙蓉，金碧晶熒殿閣重。
隱士有緣來化鶴，梵王無語坐降龍。
鐘聲兩岸占昏曉，海眼中冷湛夏冬。
八十高僧供茗罷，細談蘇米舊時蹤。

題金山寺

元 僧明本

半江湧出金山寺，一簇樓臺兩岸船。
月到中宵成白晝，浪翻平地作青天。
塔鈴自觸微風語，灘石長磨細浪圓。
龍化楚人來聽法，手擎珠獻不論錢。

金山

明 王叔承

龍宅龍宮紫氣驕壯遊南北倚青霄蜀江萬里來春水
吳嶼千尋帶暮潮夾岸帆檣揚子渡隔天雲樹廣陵橋
臨流無限風塵思濁酒淋漓劒影搖

七言絕句

金山寺

唐 竇庠

一點青螺碧浪中全依水府與天通晴江萬里雲飛盡
鰲背參差日氣紅

過金山

元
耶律楚材

金山前畔水西流一片晴山萬里秋
蘿月團團上東嶂翠屏高挂水晶毬

金山

明
董應舉

南條一線自峨岷拆楚分吳劃到天
獨有妙高臺上月不為南北隔風煙

附焦山

五言古

題焦山方丈

元薩都拉

江風入霜林寒葉下疎雨蕭蕭復蕭蕭可聽不可數山
僧亦好奇呼童掃行路何處覓秋聲肩輿入山去

七言古

自金山放船至焦山

宋蘇軾

金山樓觀何眈眈撞鐘擊鼓聞淮南焦山何有有修竹
採薪汲水僧兩三雲霾浪打人迹絕時有沙戶祈春蠶
我來金山更留宿而此不到心懷慙同遊盡返決獨往

賦命窮薄輕江潭清晨無風浪自湧中流歌嘯倚半酣
老僧下山驚客至迎笑喜作巴人談自言久客忘鄉井
只有彌勒為同龕困眠得就紙帳暖飽食未厭山蔬甘
山林饑卧古亦有無田不退寧非貪展禽雖未三見黜
叔夜自知七不堪行當投劾謝簪組為我佳處留茅菴

焦山寺

元周權

赤霞夜出扶桑東海雲捲浪凌虛空剛風浩浩吹不去
崔嵬化作青蓮宮萬衲月寒清梵寂四面沈沈皆海色

鐘聲不許到人間自送潮音落寒碧

七言律

遊焦山

元 郭天錫

砥柱中流障北溟海門對勢兩峰青
鶴歸幽竇雲煙冷
龍卷空江樹石腥為爾欲招蓮社侶
嗟余久負艸堂靈
坡翁綸老知何處西日荒寒照野亭

遊焦山寺

元 周伯琦

涉江已閱裴公洞復訪焦先到此山
險絕遠同巴蜀峽

巋然對峙海門關
神蛟戲浪時潛躍
野鳥巢林自往還
建業青山廣陵樹
開軒盡在酒壺間

六言絕句

焦山題塔

元陳柏

樹老雲閒鳥宿洞
深月落潮迴此時
此興不淺何日何
年再來

七言絕句

焦山吸江亭

宋孫覲

昔年携客寄僧龕
敗屋疎籬一草菴
白首重來看修竹
連山樓觀亦耽耽

其二

萬頃蒼茫一島孤
潭潭雲海現毗盧
問君吸盡西江水
中有曹谿一滴無

宿焦山上方

元郭天錫

揚子江頭風浪平
焦山寺裏晚鐘鳴
爐煙已斷燈花落
喚起山僧看月明

御定佩文齋詠物詩選卷五十八

欽定四庫全書

御定佩文齋詠物詩選卷五十九

茅山類

五言古

遊茅山

唐
儲光羲

平生非作者望古懷清芬
心以道為際行將時不羣
茲山在人境靈脫久傳聞
遠勢一峰出近形千嶂分
冬春有茂草朝暮多鮮雲
此去亦何極但言西日曛

其二

名嶽徵仙事清都訪道書山門入松栢天路涵空虛南
極見朝采西潭聞夜漁遠心尚雲宿浪跡出林居為已
存實際忘形同化初此行良已矣不樂復何如

七言古

登大茅峰

元
吳全節

第一福地第一峰玉臺積翠摩蒼空大君成道二弟從
還丹返老顏如童繡衣趣召凌天風此事萬古將無同

山高有仙水有龍
龍腹如篆朱砂紅
蜿蜒變化理莫窮
作霖濟早年屢豐
神仙為市壇朝宗
真人渙號芝泥封
猿鶴相語千載逢
葵心耿耿通宸楓
萬里六轡馳花驄
香飄龍篆江雲東
瑞凝草木氣鬱蔥
稽首峰頂歌元功
他時歸奉明光宮

五言律

茅山洞口

唐
綦毋潛

華陽仙洞口半嶺拂雲看
窈窕穿苔壁差池對石壇
方

隨地脈轉稍覺水晶寒未果變金骨歸來茲路難

送陸羽之茅山寄李延陵

唐 劉長卿

延陵衰草徧有路問茅山雞犬驅將去煙霞擬不還
新家彭澤縣舊國穆陵關處處逃名姓無名亦是閒

茅山第三峰

元 吳全節

三茅琳宇狀松老鶴知還江白南徐月樓青北固山
浮雲通地肺古洞敞天關寄語尋仙者蓬萊只此間

七言律

贈茅山高拾遺

唐
許渾

諫獵歸來綺季歌
大茅峰影滿秋波
山齋留客掃紅葉
野艇送僧披綠蓑
長覆舊圖棋勢盡
徧添新品藥名多
雲中黃鵠日千里
自宿自飛無網羅

江南道中懷茅山廣文南陽博士

唐
皮日休

住在華陽第八天
望君惟欲結良緣
堂局洞裏千秋燕
厨蓋巖根數斗泉
壇上古松疑度世
觀中幽鳥恐成仙

不知何事迎新歲烏納裘中一覺眠

其二

五色香煙惹內文石飴初熟酒初醺將開丹竈那防鶴
欲算棋圖却望雲海氣半生當洞見瀑冰初拆隔山聞
如何世外無交者一卧金壇只有君

懷華陽潤卿博士

皮日休

鳳骨輕來稱瘦容華陽館主未成翁數行玉札存心久
一掬雲漿漱齒空白石煮多熏屋黑丹砂埋久染泉紅

他年欲事先生去十賚須加陸逸冲

和江南道中懷茅山廣文南陽博士

唐
陸龜蒙

一片輕帆背夕陽望三峰拜七真堂天寒夜漱雲牙淨
雪壞晴梳石髮香自拂煙霞安筆格獨開封檢試砂牀
莫言洞府能招隱會輾飈輪見玉皇

其二

壺中行坐可携天何況林間息萬緣組綬任垂三品石

珮環從落四公泉
丹臺已運陰陽火
碧簡須雕次第仙
想得雷平春色動
五芝煙甲又芊眠

和懷華陽潤卿博士

陸龜蒙

火影應難到洞宮
蕭閒堂冷任天風
談玄麈尾拋雲底
服散龍胎在酒中
有路還將赤城接
無泉不共紫河通
竒編早晚教傳授
免以神仙問葛洪

五言絕句

茅山

元姚文真

山雲護芝田
山雨清茵閣
中有學仙人
吹簫待鸞鶴

六言絕句

送鄭二之茅山

唐
皇甫冉

水流絕澗終
日草長深山
暮春犬吠雞
鳴幾處條桑
種杏何人

七言絕句

茅山道中

唐
趙嘏

煙樹重重水
亂流馬嘶殘
雨晚程秋門
前便是西山路

目送歸雲不得遊

送人遊茅山

唐僧貫休

茅真舊宅基猶在藥竈苔深土尚殷君見道人憑與問
大還還字若為還

將遊茅山先寄道士張伯雨

元薩都拉

借騎白鶴訪茅君琪樹秋聲隔夜聞料得山中張道士
開門先掃鶴巢雲

遊三茅華陽諸洞

元宋无

玉案清香徹夜焚
紫煙成蓋覆茅君
數聲金磬秋壇霽
敲碎遙天一縷雲

登茅山天市壇

元僧惟則

天市危欄倚碧空
兩京山水見冥蒙
東來十日風霜路
只在寒嵐一抹中

御定佩文齋詠物詩選卷五十九

欽定四庫全書

御定佩文齋詠物詩選卷六十

武夷山類

五言古

行視武夷精舍作

宋朱子

神山九折谿公沂此中半水深波浪闊浮綠春渙渙上
有蒼石屏百仞聳雄觀巔巖露琅瑯突兀倚霄漢淺麓
下縈迴深林久叢灌胡然閱千載逮此開一旦我乘新

村船輟棹青草岸榛莽喜誅鉏面勢窮考按居然一環
堵妙處豈輪奐左右矗竒峰躊躇極佳玩是時芳節闌
紅綠紛有爛好鳥時一鳴王孫遠相喚楚遊意已愜獨
往身猶絆珍重舍瑟人重來足幽伴

武夷道中

元

黃清老

積雨多浮雲百川合為一新晴落花深草逕沒行迹谿
風淡和柔天宇浩澄碧諸峰出雲間淨若露初拭遲遲
策駑馬稍稍度翠壁從人不知疲佳境恣所歷松間古

仙人燕坐松下石羽化今幾年蒼苔滿雙屐乾坤妙無
言小大自有得為我謝羣芳春風各努力

五言律

武夷山

元
雅勒呼

笙鶴遼天杪仙家宴幔亭鯨波一浸碧蟻垤九煙青洞
闕秦人蛭壇留漢祀星余方有公事未得叩巖扃

七言律

寄武夷思學齋

元
王士熙

武夷山色青於水
君築高齋第幾峰
北苑鶯啼春煮茗
西風鶴語夜巢松
田家送酒芝香瀉
道士留書石髓封
聞說牙籤三萬軸
欲憑南鴈約相從

武夷山

元

雅勒呼

九曲谿山紫氣分
千年來駐武夷君
仙家開宴人曾遇
天樂留音世未聞
鼓石日華騰鳳彩
劒波霞影動龍文
樵歌便欲尋巖壑
畫裏先開萬疊雲

題武夷

明

阮自華

初聞雞犬異人間漸入青霞細可憐
蹊上紅泉無徑路山中香雨有神仙
每逢水盡奇峰出若為天迴曲道前
一鑑澄潭思千古誰當先掃石爐煙

五言絕句

武夷山仙城

唐徐凝

武夷無上路毛徑不通風欲共麻姑住
仙城半在空

武夷天柱峰

宋朱子

屹然一天柱雄鎮幹維東抵說乾坤大
誰知立極功

七言絕句

武夷山

唐
李商隱

只得流霞酒一杯
空中簫鼓當時迴
武夷洞裏生毛竹
老盡曾孫更不來

武夷

宋
葛長庚

幾點沙鷗泛碧流
蘆花兩岸暮雲愁
鼓樓巖下一聲笛
驚落梧桐飛起秋

武夷山一線天

明
徐渭

雙峽凌虛一線通
高巔樹果拂雲紅
青天萬里知何限
也伴藤蘿鎖峽中

御定佩文齋詠物詩選卷六十

欽定四庫全書

御定佩文齋詠物詩選卷六十一

廬山類

四言古

廬山神仙詩

晉
湛方生

吸風玄圃飲露丹霄室宅五岳賓友松喬

五言古

廬山東林雜詩

晉
僧惠遠

崇巖吐清氣幽岫棲神跡希聲奏羣籟響出山溜滴有
客獨冥遊徑然忘所適揮手撫雲門靈關安足闢留心
叩元扃感至理弗隔孰是騰九霄不奮冲天翮妙同趣
自均一悟超三益

夜宿石門詩

宋
謝靈運

朝搴苑中蘭畏彼霜下歇暝還雲際宿弄此石上月鳥
鳴識夜棲木落知風發異音同至聽殊響俱清越妙物
莫為賞芳醕誰與伐美人竟不來陽阿徒晞髮

登廬山絕頂望諸嶠

謝靈運

積峽忽復啟平塗俄已閉巒隴有合沓往來無蹤轍晝
夜蔽日月冬夏共霜雪

登廬山

宋鮑照

懸裝亂水區薄旅次山楹千巖盛阻積萬壑勢迴縈龍
嵒高昔貌紛亂襲前名洞澗窺地脈聳樹隱天經松磴
上迷密雲竇下縱橫陰冰實夏結炎樹信冬榮嘈噴晨
鵑思叫嘯夜猿清深崖伏化迹穹岫閔長靈乘此樂山

性重以遠遊情方躋羽人途永與煙霧并

其二

訪世失隱淪從山異靈士明發振雲冠升嶠遠棲趾高
岑隔半天長崖斷千里氛霧承星辰潭壑洞江汜蘄絕
類虎牙噴吼象熊耳埋冰或百年韜樹必千祀雞鳴清
澗中猿嘯白雲裏瑤波逐穴開霞石觸峰起迴互非一
形參差悉相似傾聽鳳管賓緬望釣龍子松桂盈膝前
如何穢城市

從登香爐峰

鮑照

辭宗盛荆夢登歌美鬼繹徒收杞梓饒曾非羽人宅羅
景藹雲扃沾光扈龍策御風親列涂乘山窮禹跡含嘯
對霧岑延蘿倚峰壁青冥搖煙樹穹跨負天石霜崖滅
土膏金澗測泉脈旋淵抱星漢乳竇通海碧谷館駕鴻
人巖棲咀丹客殊物藏珍怪竒心隱仙籍高世伏音華
綿古遁精魄蕭瑟生哀聽參差遠驚覲慙無獻賦才洗
汗奉毫帛

從冠軍建平王登廬山香爐峰

梁江淹

廣成愛神鼎淮南好丹經此山具鸞鶴來往盡仙靈
瑤草正翕艷玉樹信葱菁絳氣下縈薄白雲上杳冥
中坐瞰蜿蜒伏視流星不尋遐怪極則知耳目驚日
落長沙渚層陰萬里生藉蘭素多意臨風默含情
方學松栢隱羞逐市井名幸承光誦末伏思託後
旂

湖中望廬山

唐孟浩然

太虛生月輝舟子知天風挂席候明發渺漫平湖中
中流見匡阜勢壓九江雄黯黯容霽色崢嶸當曉空香爐
初上日瀑水噴長虹久欲追尚子况茲懷遠公我來限
于役未暇息微躬淮海途將半星霜歲欲窮寄言巖棲
者畢趣當來同

送東林廉上人歸廬山

唐
王昌齡

石谿流已亂苔徑入漸微日暮東林下山僧還獨歸昔
為廬峰意况與遠公違道性深寂寞世情多是非會尋

名山去豈復望清輝

過廬山下

宋 蘇軾

亂雲欲覆山勢與飄風南羣鷗相應和勇往爭驂驪可
憐蒼蔚中時出紫翠嵐鴈沒失東嶺龍騰見西龕一時
供坐嘯百態變立談暴雨破塊北清飈掃渾酣廓然歸
何處陋矣安足戡亭亭紫霄峰窈窕白石菴五老數松
雪雙谿落天潭雖云默禱應顧有移文慙

山北紀行

宋 朱子

祇役廬山陽矯首廬山陰雲峰不可覲碧澗何由尋昨
朝解印章結友同窺臨盡彼巖壑勝滿茲仁智心

其二

行逢石門雨解驂寒澗東朝濟錦繡谷俯仰春溟蒙懸
泉忽琮琤雜樹紛青紅屢憇小亭古幽探思無窮

其三

竦身長林端策足層崖表仰瞻空界闊俯歎塵寰小天
池西嶽奎佛手東窈窕杖履往復來憑軒瞰歸鳥

廬山雜興

宋 僧道潛

古帝論匡山南國之德鎮爾來得躋攀此語始吾信雄
雄壓九江矗矗排萬刃青天落飛瀑白日雷霆震石鏡
俄忽開孤光舞而運異花無冬春瑤草亦芳潤遠公初
渡江道譽藹東晉劉雷贊高風遯世各無悶陳迹虎谿
頭予今誰與訊

其二

衆峰勢連環萬疊不可窮香爐獨秀拔佳氣常蔥蔥長

風卷遊霧曉壁開
瞳朧招提出其下
樓觀排青紅回眸
盼五老刻削金芙蓉
宜哉謫仙子愛此巢雲松

其三

山南信美矣山北尤增奇
春風錦繡谷紅素自相依
梯空上絕巘雲日驚倒窺
崖壁暈祥光五色成
玻瓈旁通大林寺松竹短
且鼓樂天當日遊四月桃
始披餘齡願寄此永與人世違

其四

高巖吐奇雲倏忽千萬丈援毫欲名貌卷縮非一狀飛
仙或遨遊隱隱出其上驚飈忽吹滅轉盼惟青嶂山中
勝事多彼俗誰能亮

七言古

附長短句

蜀中送人遊廬山

唐

僧隱巒

君遊正值芳春月蜀道千山皆秀發谿邊十里五里花
雲上三峰五峰雪君上匡山我舊居松蘿拋擲十年餘
君行試到山前問山鳥只今相憶無

登繩金塔望廬山

明 楊基

過魯必謁岱入洛須望嵩嗟余夜半入彭蠡月黑不見
香爐峰明登望湖亭雨氣何空濛山僧指點笑五老正
在煙雲中今朝躡層梯高標揭晴空匡廬遠出百里外
紫翠映帶春霞紅雖云彷彿見顏色已覺浩蕩開心胸
在山看青山佳處未盡逢不如迥立萬仞表一日覽盡
千玲瓏何當生羽翰兩腋乘天風不論雨雪與晴霽回
翔下上飽玩八面青芙蓉

五言律

廬山

唐

王貞白

嶽立鎮南楚，雄名天下聞。
五峰高闕日，九疊翠連雲。
夏谷雪猶在，陰巖晝不分。
唯應嵩與華，清峻得為羣。

宿廬山絕頂精舍

唐

崔塗

一登出林端，千峰次第看。
長閒如未遂，暫到亦應難。
谷樹雲埋老僧窓，瀑影寒自嫌。
心不達，向北夢長安。

憶廬山舊遊

唐

黃滔

前年入廬嶽數宿在靈谿殘燭松堂掩孤峰月狖啼平生為客老勝境失雲棲縱有重遊日煙霞會恐迷

五言排律

廬山

唐

李成用

非嶽不言嶽此山通嶽言高人居濁世幾處滿前軒秀作神仙宅靈為風雨根餘陰鋪楚甸一柱表吳門靜得八公侶雄臨九子尊對猶青熨眼到必冷凝魂勢受重湖讓形難七澤吞黑巖藏畫電紫霧泛朝暎蓮墮寧唯

華玉焚堪小崑倒松微發罇飛瀑遠成痕疊見雲容襯
稜收雪氣昏裁詩曾困謝作賦偶無孫流礙星光撒驚
衝鴈陣翻峰竒寒倚劒泉曲旋如盆草短分雛雉林明
露擲猿秋楓紅蝶散春石谷雷奔月好虎谿路煙深栗
里源醉吟長易醒夢去亦消煩有覺南方重無疑厚地
掀輕揚聞舊俗端用鎮元元

和段校書冬夕寄題廬山

唐
劉得仁

名高身未到此恨蓄多時是夕吟因話他年去必隨當

時廬嶽頂半入楚江湄幾處懸崖上千尋瀑布垂
廬峰松浙瀝湓浦棹參差日色連湖白鐘聲拂浪遲
煙梯緣薜荔嶽寺步欹危地本饒靈草林曾出祖師
石樓霞耀壁猿樹鶴分枝細徑縈巖末高窓見海涯
嵌空寒更極寂寞夜尤思陰谷冰埋木仙田雪覆芝
亂泉禪客漱琪跡逸人知蘚室新開竈檉潭未了
棋如何遂閒放長得任希夷定務漁樵事方無道路
悲謝公臺尚在陶令柳旋衰塵外難相許人間貴跡
遺雖懷丹桂影不忘白雲

期仁者終携手今朝豫賦詩

七言律

懷廬嶽舊隱

唐

杜荀鶴

一別三年長在夢夢中時躡石稜層泉聲入夜方堪聽
山色逢秋始好登巖鹿慣隨鋤藥叟谿鷗不怕洗苔僧
人間有許多般事求要身閒直未能

歲暮晚泊望廬山不見懷岳僧呈察判

唐

李建勲

貪程只為看廬阜及到停舟恨頗濃雲暗半空藏萬仞
雪迷雙瀑在中峰林端莫辨曾遊路鳥際微聞向暮鐘
長媿昔年招我入共尋香社見芙蓉

懷廬山舊隱

唐僧若虛

九疊嵯峨倚著天悔隨寒瀑下巖煙深秋猿鳥來心上
靜夜松杉到眼前書架想遭苔蘚裏石窓應被薜蘿纏
一枝筇竹遊江北不見廬峰二十年

和詹叔遊廬山見寄

宋韓維

香爐峰色壓羣山
仰眺頻教使者冠
江面煙波搖紫翠
佛宮金碧照晴寒
密藏幽谷梅千樹
散走鳴泉竹萬竿
今日頓驚塵慮盡
一章佳句雪中看

廬山

宋戴復古

山靈未許到天池
又作西林一宿期
寺是晉時陶侃宅
記傳隋代率更碑
山椒雲氣易為雨
客子情懷多費詩
暫借蒲團學禪寂
茶煙飛繞鬢邊絲

五言絕句

廬山獨夜

唐 徐凝

寒空五老樹斜月九江雲
鐘磬知何處蒼蒼樹裏聞

初入廬山

宋 蘇軾

青山若無素偃蹇不相親
要識廬山面他年是故人

其二

自昔懷清賞神遊杳靄間
如今不是夢真箇是廬山

七言絕句

望廬山五老峰

唐 李白

廬山東南五老峰青天削出金芙蓉九江秀色可攬結
吾將此地巢雲松

題廬山雙劍峰

唐來鵬

倚天雙劍古今閒三尺高於四面山若使火雲燒得動
始應農器滿人間

題西林壁

宋蘇軾

橫看成嶺側成峰遠近高低總不同不識廬山真面目
只緣身在此山中

題廬山

宋晁補之

南康南麓江州北五百僧房綴蜜脾盡是廬山佳絕處
不知何處合題詩

廬山雜興

宋僧惠洪

幽花踈竹冷捎雲江北江南正小春但得青山常在眼
不妨白髮暗隨人

其二

別開山徑入松關半在雲間半雨間紅葉滿庭人倚檻

金匱要略卷六十一
一池寒水動秋山

其三

秋山木落見遙邨
取次人家只隔雲
一陣西風雨中過
數聲笑語嶺頭聞

登石鐘山望廬山

明張治

廬嶽亭亭翠萬重
懸泉千尺挂飛龍
石鐘山下江如鏡
映出青天五老峰

御定佩文齋詠物詩選卷六十一

欽定四庫全書

御定佩文齋詠物詩選卷六十二

九華山類

五言古

和李友題九華山

唐僧神穎

衆嶽雄分野九華鎮南朝彩筆凝空遠崔嵬寄青霄
龍潭古仙府靈藥今不凋瑩為滄海鏡煙霞作荒標
造化心數竒性狀精氣饒玉樹鬱玲瓏天籟韻簫韶
寂寂尋

乳竇競兢行石橋通泉漱雲母藉草縈香苔我住幽且
深君賞昏復朝稀逢發清唱片片凌霜颼

望九華山

元
吳師道

輕舟下池口遙望青陽郭雲間見九華爭先出鋒鏑參
差敵背缺峭銳圭首削竹箭拔春芽芙蓉攢秋萼竒姿
信明麗遠勢仍聯絡下有巖谷幽眞靈諒茲宅詭哉未
世士強以名號託丹崖不受滓青峰鎮如昨千載知屬
誰含情寄冥漠

七言古

附長短句

九華山

唐

劉禹錫

奇峰一見驚魂魄
意想洪爐始開闢
疑是九龍夭矯欲
攀天忽逢霹靂一聲化
為石不然何至今
悠悠億萬年
氣勢不死如騰公
雲含幽兮月凝暉
兮江漾影結根不得
要路津迥秀長在
無人境
軒皇封禪登云
亭大禹會計臨東
溟乘櫟不來廣樂
絕獨與猿鳥愁青
熒君不見敬亭之
山廣索漠兀如斷
岸無稜角宣城謝

眺一首詩遂使聲名齊五岳九華山九華山自是造化
一尤物焉能藉甚乎人間

郡樓望九華歌

唐 霍 總

樓上坐見九子峰翠雲赤日光溶溶有時朝昏變疎密
八峰和煙一峰出有時風卷天雨晴聚立連連如弟兄
陽鳥生子偶成數丹鳳養雛同此名日日遙看機已靜
未離塵躅思真境子明龍駕騰九垓陵陽相對空崔嵬
玉漿瑤草不可見自有神仙風馬來

望九華

宋程俱

卷簾對坐江南山
掠眼送青來
疊疊雲泉肺腸久厭飫
挂頰悠悠聊復爾
奇峰遠澹忽四五
爽秀駸駸逼窻几
平生九華盛名下一見定知真是矣
非關目力覩天奧
正覺羣山如聚米
好山如人有高韻
不獨江州孟公子
直緣佳處無仕逕
落莫道邊同苦李
大是忘年耐久交
藜杖青鞋結終始

五言律

望九華寄池陽太守

唐 曹 松

造化峰峰異宜教岳德謙靈蹤載籍古怪刃刺雲尖盤
感陵陽壯孤標建鄴瞻霽餘堪洗目青出謝家檐

七言律

九華山

唐 郭 夔

儼翠凌空出迴然宮堯萬丈倚秋天暮風飄送當軒色
曉霧斜飛入檻煙簾捲綺屏雙影聚鏡開朱戶九條懸
畫圖何必家家有自有畫圖來目前

望九華山

唐
柴 夔

九華如劒挿雲霓
青霄連空望欲迷
北截吳門疑地盡
南連楚界覺天低
龍池水蘸中秋月
石路人攀上漢梯
惆悵舊遊無復到
會須登此出塵泥

宿九華化城寺莊

唐
僧冷然

佛寺孤莊千嶂間
我來詩境強相關
巖邊樹動猿下磴
雲裏錫鳴僧上山
松月影寒生碧落
石泉聲亂噴潺湲
明朝更躡層霄去
誓共煙霞到老閒

九華山下夜泊

明 王守仁

維舟谷口傍煙霏共說前岡石徑微竹杖穿雲尋寺去
藤筐採藥帶花歸諸生晚佩聯芳杜野老春霞綴衲衣
風詠不須沂水上碧山明月更清輝

七言絕句

晴望九華山

唐 楊 鴻

九華閒望簇清虛氣象羣峰盡不如惆悵南朝挂冠吏
無人解向此山居

代書問費徵君九華事

唐蕭建

見說九華峰上寺日宮猶在下方開其中幽境客難到
請為詩中圖畫來

晚登九華山

明吳兆

望江亭望晚江晴颯颯秋兼風水聲寺隔數峰猶未到
禪燈幾點翠微明

別九華山

吳兆

複嶺重巖出路賒漸看龍口有人家行行數里猶回首

秋雪滿山蕎麥花



御定佩文齋詠物詩選卷六十二

欽定四庫全書

集部

御定佩文齋詠物詩選卷

六十三至
七十三

詳校官侍郎_臣李封

主事銜_臣徐以坤覆勘

總校官檢討_臣何思鈞

校對官中書_臣王瓚

謄錄監生_臣黃奕遐

欽定四庫全書

御定佩文齋詠物詩選卷六十三

小孤山類

五言古

泊小孤山

京陳造

楚山屹兩姑我乃見其稚聞名詩卷間識面容舟次玉
刺極端麗簪植暝蒼翠娟月上天角相與詭嫵媚怒風
將我西未愁卜晚憩山足舟可艤山水纜可繫山外正

風波獨此佳食寐斷知有神物主此勝絕地明朝捐行
橐可無答神賜白鷺雪為肪綠蟻香馥鼻舟穩風又熟
無乃契神意未暇訪彭郎辭費辨非是

過小孤山

明楊基

大孤俯如盤小孤儼而立羣山如從使左右相拱揖孤
根屹撐拄萬竅爭噴噏濶濶陰風旋慘慘元氣濕江流
亘其下震怒莫敢汲洑為盤渦深馳作奔馬急躋攀或
失手一駛不可及我來值秋晚木落衆鳥集勿覺夜然

犀鰈人抱珠泣

七言古

小孤山

元范梈

小孤有石如虎蹲西望屹作長江門
洪濤萬古就繩墨雖有勁勢不敢奔
大哉禹功悉經理何必有志今能存
大者為綱小者紀不徒百谷知王尊
靈祠正在石壁下
我來適值秋風昏明朝東行弔碣石
更與尋河問九源

小孤山

明邵寶

昔聞砥柱黃河中萬古坐鎮狂瀾東小孤乃是江砥柱
特起不與羣山同羣山隨江挺奔馬愛此石筍凌蒼穹
孤哉孤哉本天造一任巨浪乘長風節宣風受神禹戒
滔滔不礙江朝宗我來信宿彭澤下咫尺仰望神妃宮
翠烟霏霏落杯酒千帆閱盡澄潭空舉杯酌江江日白
隔江縹緲留青峰便當載筆賦東海三山點破雲冥濛
七言律

小孤山曉發和蔡思敬韻

元揭傒斯

日落霞明錦浪翻
崖傾石峭白雲間
乾坤上下雄孤柱
巴蜀東南壯此關
神物夜移風動地
仙舟曉渡月漫山
回瞻絕頂登臨處
空翠冥濛杳靄間

次小孤山

元
丁鶴年

峽束千雷怒擊撞
危峰屹立壓驚瀧
山聯廬霍朝三楚
水落荆揚限九江
鎮海重關當第一
擎天孤柱故無雙
珮環月夜知何處
露濕蓬萊玉女窓

和貝惟學登小孤山韻

明
程本立

西來風浪湧金山人在鴻濛沆瀣間大地小孤天柱石
長江第一海門關鮫人夜泣珠成淚龍女晴梳翠作鬟
欲問靈巫報神語我行何日定東還

七言絕句

小孤山

唐顧況

古廟楓林江水邊寒鴉接飯雁橫天大孤山遠小孤出
月照洞庭歸客船

曉飯小孤山下

明胡梅

兩岸黃蘆霜滿船推篷曉爨鷺鷥前
小孤山下風初定
江面剛生一寸烟

御定佩文齋詠物詩選卷六十三

欽定四庫全書

御定佩文齋詠物詩選卷六十四

天台山類

五言古

天台曉望

唐李白

天台鄰四明華頂高百越門標赤城霞樓棲滄島月憑
高登遠覽直下見溟渤雲垂大鵬翻波動巨鰲沒風潮
爭洶湧神怪何翕忽觀竒跡無倪好道心不歇攀條摘

朱實服藥鍊金骨安得生羽毛千春卧蓬闕

送超人歸天台

唐孟郊

天台山最高動躡赤城霞何以靜雙目掃山除妄花何
以潔其性瀟泉去泥沙靈境物皆直萬松無一斜月中
見星近雲外將世賒山獸衛方丈山猿捧袈裟遺身獨
得身笑我牽名華

天台中

明吳鼎芳

白雲伴衾宿開戶雲飛去出戶尋白雲蒼厓濕芒屨峰

頭異域僧洞口先朝樹流水帶餘花從來不知處

五言律

尋天台山

唐 孟浩然

吾愛太乙子
淦霞卧赤城
欲尋華頂去
不憚惡谿名
歇馬憑雲宿
揚帆截海行
高高翠微裏
遙見石梁橫

天台閒望

唐 李敬方

天台十二旬
一片雨中春
林果垂楊盡
山苗半夏新
陽鳥晴展翅
陰魄夜飛輪
坐冀無雲物
分明見北辰

送人之天台

唐李洞

行李一枝藤雲邊叩曉冰丹經如不謬白髮亦何能淺
井仙人鏡明珠海客燈乃知真隱者笑就漢廷徵

七言律

因話天台勝異仍送羅道士 唐方干

積翠千層一徑開鶴盤山腹到瓊臺藕花飄落前巖去
桂子流從別洞來石上叢林礙星斗窓前瀑布走風雷
縱云孤鶴無留滯定恐烟蘿不放回

送孫百篇遊天台

方干

東南雲路落斜行入樹穿却見赤城遠近時常昏藥氣
高低無處不泉聲映巖日向牀頭沒濕竹雲從柱底生
更有仙花與靈鳥恐君多半未知名

送郭秀才遊天台

唐許渾

雲埋陰壑雪凝峰半壁天台已萬重人度碧谿疑輟棹
僧歸蒼嶺似聞鐘暖眠灘鴈晴灘草高掛欄猴暮澗松
曾約共遊今獨去赤城西面水溶溶

五言絕句

天台獨夜

唐徐凝

銀地秋月色石梁夜谿聲誰知屐齒盡為破烟苔行

思天台山

唐許渾

赤城雲雪深山客負歸心昨夜西齋宿月明琪樹陰

七言絕句

無題

明林章

曾從洞口送胡麻一隔山門即海涯自是仙郎忘舊路

桃花流水不曾差

御定佩文齋詠物詩選卷六十四

欽定四庫全書

御定佩文齋詠物詩選卷六十五

普陀山類

五言古

夕泛海東尋梅岑山觀音洞遂登磐陀石望日

出處

元吳萊

山月出天末水面生晚寒扁舟劃然往萬頃相渺漫星
河白搖撼島嶼青屈盤遠應壺嶠接深已雲夢吞蟠木

繫予纜扶桑纓我冠寸心役兩目少試鯨魚竿

其二

茫茫瀛海間海岸此孤絕飛泉亂垂纓險洞森削鐵天
杳固遙聞梵相俄一瞥魚龍互圍繞山鬼驚變滅舟航
來旅遊鐘磬聚禪悅笑樵小白華秋潮落如雪

五言律

遊洛伽山

宋
王安石

山勢欲壓海禪宮向此開魚龍腥不到日月影先來樹

色秋擎出鐘聲浪答回何期乘吏役暫此拂塵埃

遊補陀

明 徐啟東

夢想名山久因之駕海來潮從天上湧剎向嶼中開金
粟山為鉢蓮花水作臺磐陀望三島咫尺是蓬萊

七言律

遊補陀

元 趙孟頫

縹緲雲飛海上山挂帆三日上潺湲兩宮福德齊千佛
一道恩光照百蠻澗草巖花多瑞氣石林水府隔塵寰

鰕生小技真榮遇何幸凡身到此間

遊補陀

元盛熙明

驚起東華塵土夢滄洲到處即為家
山人自種三株樹天使長乘八月槎
梅福留丹赤似橘安期送棗大于瓜
金仙對面無言說春滿幽巖小白花

補陀島

元黃鎮成

一片雲帆駕渺茫東臨絕島拂扶桑
九天波浪隨星客萬壑魚龍覲水王
日觀遠開溟渤動雲臺倒浸白花香

候神海上應相見為覓安期却老方

遊補陀

明 張子滔

嶙峋仙界錦城堆寶樹瓊花面面迴勢壓海門鰲背重
光搖島嶼蜃樓開層巒徧向雲間出飛瀑全疑天上來
自是修真竒絕處何須弱水問蓬萊

禮洛伽山

明 沈明臣

三神山遠不能尋惟有洛伽名古今萬里扶桑開四照
九天靈鷲削孤岑一枝鸚鵡多饒舌徧海蓮花不染心

謁罷潮音靈洞口
皈依願發晚濤深

七言絕句

夢遊補陀山

明姜子羔

忽然飛渡海雲東
海色澄清霄漢通
借問此心何所似
白雲映水月當空

寶陀寺

明李應詔

茫茫鷺嶺水雲賒
今古莊嚴大士家
檻外碧空垂法象
月明島嶼盡蓮花

御定佩文齋詠物詩選卷六十五

欽定四庫全書

御定佩文齋詠物詩選卷六十六

羅浮山類

四言古

遊羅浮山

京王叔之

蒼藹靈嶽開景神封綿界盤址中天舉峰孤樓側挺層
岫迴重風雲秀體卉木媚容

五言古

登羅浮峰

宋朱子

休暇曹事簡登高恣窺臨徜徉偶此地曠望披塵襟落
日瞰遠郊暮色生寒陰歡娛未云已更欲窮幽尋行披
茂樹盡豁見滄溟深恨無雙飛翼往詣蓬山岑

七言古

遊羅浮山一首示兒子過

宋蘇軾

人間有此白玉京羅浮見日雞一鳴南樓未必齊日觀
鬱儀自欲朝朱明東坡之師抱朴老真契久已交前生

玉堂金馬久流落寸田尺宅今誰耕道華亦嘗嘅一衆
契虛正欲仇三彭鐵橋石柱連空橫杖藜欲趁飛猱輕
雲谿夜逢瘖虎伏斗壇畫出銅龍吟小兒少年有奇志
中宵起坐存黃庭近者戲作凌雲賦筆勢彷彿離騷經
負書從我盍歸去羣仙正草新宮銘汝應奴隸蔡少霞
我亦李孟山元卿還須略報老同叔羸糧萬里尋初平
七言律

羅浮

明
孫 賁

四百峰巒列海圖飛雲絕頂敞玄都丹砂五色時光焰
紫翠中天半有無觀裏松株皆住鶴山中竹葉盡成符
鐵橋歸去尋清賞爛醉仙人白玉壺

五言絕句

賦羅浮山

唐袁少年

羅浮南海外昔日已聞之千里來遊覽幽情我自知

御定佩文齋詠物詩選卷六十六

欽定四庫全書

御定佩文齋詠物詩選卷六十七

惠山類

五言古

遊惠山

宋蘇軾

夢裏五年過覺來雙鬢蒼還將塵土足一步漪瀾堂俯
窺松桂影仰見鴻鶴翔炯然肝肺間已作冰雪光虛明
中有色清淨自生香還從世俗去永與世俗忘

其二

敲火發山泉烹茶避林樾
明窓傾紫盞色味兩奇絕
吾生眠食耳一飽萬想滅
頗笑玉川子饑弄三百月
豈如山中人睡起山花發
一甌誰與其門外無來轍

七言古

惠山雲開復合

東 楊萬里

二年常州不識山
惠山一見開心顏
只嫌雨裏不予細
髣髴隔簾青玉鬟
天風忽吹白雲坼
翡翠屏開倚南極

政緣一雨染山色未必雨前如此碧看山未了雲復還
雲與詩人偏作難我船自向蘇州去白雲穩向山頭住

七言律

與華景彰遊惠山

明馬治

華波春水綠漪漪二月西山雪後時舊宅重尋孝子傳
新年又赴故人期鶴鳴竹日當窓澹僧定茶烟出閣遲
我欲同修清淨業泉頭來記四賢祠

五言絕句

春日遊惠山

明孫一元

閒撫谿邊石坐談竹下門殘霞不作雨遠水欲浮邨

七言絕句

懷錫山藥名離合

唐皮日休

暗竇養泉容泱泱明園護桂放亭亭歷山居處當天半
夏裏松風盡足聽

其二

曉景半和山氣白薇香清淨雜纖雲竇頭自是眠平石

腦側空林看鹿羣

奉和懷錫山藥名離合

唐陸龜蒙

鶴伴前谿栽白杏人來陰洞寫枯松
蘿深境靜日欲落石上未眠聞遠鐘

其二

佳句成來誰不伏神丹偷去亦須防
風前莫怪携詩稿本是吳吟盪漿郎

惠山

明邵寶

登登山路轉山阿須向仙人洞口過澗水清時青草短
巖花深處白雲多

御定佩文齋詠物詩選卷六十七

欽定四庫全書

御定佩文齋詠物詩選卷六十八

虎丘山類

五言古

從永陽王遊虎丘山

陳張正見

滄波壯鬱島
洛邑鎮崇芒
未若茲山麗
岩堯擅水鄉
地靈侔少室
塗艱像太行
重巖標虎踞
九曲峻羊腸
溜深澗無底
風幽谷自涼
寶沈餘玉氣
劒隱絕星光
白雲多

異影丹桂有叢香
遠看銀臺竦洞塔
耀山莊瑞草生金
地天花照石梁

遊虎丘山精舍

陳江總

縱棹憐迴曲
尋山靜見聞
每同芳杜性
須與俗人分
貝塔涵流動
花臺徧嶺芬
蒙籠出檐桂
散漫繞窓雲
情幽豈拘物
志遠易驚羣
何由狎魚鳥
不願屈元纁

登虎丘山

元貢奎

古士雅巾屨
具舟約芳遊
朝晴出西郭
午涼登虎丘
松

徑度遙嶺歷此層級脩當時吳王劒斨光裂巖幽平甸
眺萬頃閒瞻烟樹稠頗聞山僧賢飛錫下林陬獨遺方
丈室於焉集清流一簞可平生豈惜半日留煮茗試泉
冽焚香延宿籌疎雨催晚歸谿波散浮漚

五言律

遊虎丘

明張羽

春入翠微深春風吹客襟相携木上座來禮石觀音老
樹積古色薄雲生晝陰林僧修茗供默坐契禪心

五言排律

刻清遠道士詩因而繼作

唐顏真卿

不到東山寺于今五十春
竭來從舊賞林壑宛相親
吳子多藏日秦皇厭勝辰
劒池穿萬仞磐石坐千人
金氣騰為虎琴臺化若神
登壇仰生一捨宅歎珣珉
中巖分雙樹迴巒絕四鄰
窺臨江海接崇飾歲時新
客有神仙者於茲雅麗陳
名高清遠峽文聚斗牛津
跡異心寧間聲同質豈均
悠然千載後知我揖光塵

七言律

三月望日遊虎丘寺題小吳軒

元張翥

海湧峰前雲樹盤，佛宮飛閣出巔巘。
虎來古塚金精白，龍卧秋池劍影寒。
禪老說空留壞石，鬼仙題雨下虛壇。
憑高不盡登臨興，更借西山晚翠看。

虎丘詠

明黃省曾

芙蓉近倚闔閭城，眺閣觴樓逐勢成。
珠寺翻為歌舞地，

青山盡是綺羅情
巖花吐學紅粧麗
谷鳥啼兼鳳管聲
十里垂楊芳草岸
四時常映綵舟行

五言絕句

虎丘

明袁宏道

一片千人石
瑩晶若有神
劒光銷不盡
留與醉花人

七言絕句

虎丘別友人

明黃姬水

惜別銜盃過虎丘
行人無奈亂山愁
澄江一別秋風裏

楓葉蘆花是客舟

虎丘

明
程嘉燧

風散桐花松月開
上方樓殿踏歌來
携將蘆管新調曲
吹向生公舊講臺

御定佩文齋詠物詩選卷六十八

欽定四庫全書

御定佩文齋詠物詩選卷六十九

巫山類

五言古

巫山高

齊王融

想像巫山高
薄暮陽臺曲
烟霞乍舒卷
蘅芳自斷續
彼美如可期
寤言紛在矚
憮然坐相思
秋風下庭綠

巫山高

梁元帝

巫山高不窮，迥出荆門中。
灘聲下澗石，猿鳴上逐風。
樹雜山如畫，林暗澗疑空。
無因謝神女，一為出房櫳。

賦得巫山高

梁王泰

迢遞巫山疎，遠天新霽時。
樹交涼去遠，草合影開遲。
谷深流響咽，峽近猿聲悲。
只言雲雨狀，自有神仙期。

巫山高

陳蕭佺

巫山映巫峽，高殊未窮猿。
聲不辨處，雨色詎分空。
懸崖下桂月，深澗響松風。
別有仙雲起，時向楚王宮。

巫山高

唐喬知之

巫山十二峰參差互隱見
潯陽幾千里周覽忽已徧
想像神女姿摘芳共珍薦
楚雲何逶迤紅樹日葱蒨
楚雲沒湘源紅樹斷荆門
郢路不可見况復夜聞猿

七言古

巫山高

唐李賀

碧叢叢高插天大江翻瀾神曳烟
楚魂尋夢風颺然曉風飛雨生
苔錢瑤姬一去一千年丁香筇竹啼
老猿古

祠近月蟾桂寒椒花墜紅濕雲間

五言律

巫山高

唐沈佺期

巫山高不極合沓狀奇新
暗谷疑風雨陰崖若鬼神
月明三峽曉潮滿九江春
為問陽臺客應知入夢人

巫山高

唐劉方平

楚國巫山秀清猿日夜啼
萬重春樹合十二碧峰齊
峽出朝雲下江迴暮雨西
陽臺歸路直不畏向家迷

巫山高

唐皇甫冉

巫峽見巴東迢迢出半空雲藏神女館雨到楚王宮朝
暮泉聲落寒暄樹色同清猿不可聽偏在九秋中

巫山高

唐李端

巫山十二峰皆在碧虛中迴合雲藏日霏微雨帶風猿
聲寒過水樹色暮連空愁向高唐宿清秋見楚宮

巫山高

唐鄭世翼

巫山凌太清崑崙削成霏霏暮雨合藹藹朝雲生危

峰入鳥道深谷瀉猿聲別有幽棲客淹留攀桂情

七言律

題巫山廟

唐劉滄

十二嵐峰掛夕暉
廟門深閉霧烟微
天高木落楚人思
山迴月殘神女歸
觸石晴雲凝翠鬢
度江寒雨濕羅衣
嬋娟似恨襄王夢
猿叫斷巖秋蘚稀

五言絕句

夜過巫山

唐崔仲方

荆門秋水急巫峽斷雲輕若為教月夜長短聽猿聲

巫峽

唐
陸龜蒙

巫峽七百里巫山十二重年年自雲雨環珮竟誰逢

七言絕句

巫山

唐
張子容

巫嶺宮雘天際重佳期夙昔願相從朝雲暮雨連天暗
神女知來第幾峰

題巫山神女祠

時白居易除蘇州判
史自峽沿流赴郡

唐
繁知一

忠州刺史今才子行到巫山必有詩為報高唐神女道
速排雲雨候清詞

御定佩文齋詠物詩選卷六十九

欽定四庫全書

御定佩文齋詠物詩選卷七十

太行山類

四言古

從征行太行山

晉袁宏

峩峩太行凌虛抗勢天嶺交氣窈然無際澄流入神玄
谷應契四象悟心幽人來憩

五言排律

早登太行山中言志

唐明皇

清蹕度河陽凝笳上太行
火龍明鳥道鐵騎繞羊腸
白霧埋陰壑丹霞助曉光
澗泉含宿凍山木帶餘霜
野老茅為室樵人薜作裳
宣風問耆艾敦俗勸耕桑
涼德慙先哲徽猷慕昔皇
不因今展義何以冒垂堂

奉和聖製早登太行山中言志應制

唐蘇頌

北山東入海馳道上連天
順動三光注登臨萬象懸
纔

觀河內邑平指洛陽川按轡夷關險張旗亘井泉曉巖
中警柝春事下蒐田德重周王問歌輕漢后傳宸遊鋪
令典睿思起芳年願以封書奏廻鑾禪肅然

奉和聖製早登太行山中言志應制

唐
張說

六龍鳴玉鑾九折步雲端河絡南浮近山經北上難羽
儀映松雪戈甲帶春寒百谷晨笳動千巖曉仗攢皇心
感詔節敷藻念人安既立省方館復置建神壇扈蹕叅

天老承榮忝夏官長勤百年意思見一勝殘

奉和聖製早登太行山中率爾言志

唐張九齡

孟月攝提貞乘時我后征晨嚴九折度暮戒六軍行日
御馳中道風師卷太清戈鋌林表出組練雪間明動植
希皇豫高深奉睿情陪遊七聖列望幸百神迎氣色煙
猶喜恩光草尚榮之杲稱萬歲今此復同聲

奉和聖製早登太行山中言志

唐
苗晉卿

金吾戒道清羽騎動天聲砥路方南紀重巖始北征闕
樓前望遠河邑下觀平喜氣迴輿合祥風入旆輕祝堯
三老至會禹百神迎月令農先急春蒐禮後行仍親后
土祭更理晉陽兵不似勞車轍空留八駿名

七言絕句

下太行

金
李俊民

山中日日伴雲閒不見閒雲只見山君去試從山下望

青山却在白雲間

山行

元王惲

太行元氣老洪濛
草樹風前帶潤容
山色只宜差遠看
都移空翠上高峰

其二

西來遊宦半忙閒
六日迢遙道路間
回轉羊腸三百里
天教馬上飽看山

御定佩文齋詠物詩選卷七十

欽定四庫全書

御定佩文齋詠物詩選卷七十一

王屋山類

五言古

客有為余話登天壇遇雨之狀因以賦之

唐
劉禹錫

清晨登天壇平路逢陰晦疾行穿雨過却立視雲背白
日照其上風雷走於內滉漾雪海翻槎牙玉山碎蛟龍

露鬢神鬼含變態萬狀互生滅百音以繁會俯觀羣
動靜始覺天宇大山頂自晶明人間已霏霏豁然重昏
斂渙若春冰碎反照入松門瀑流飛縞帶遙光泛物色
餘韻吟天籟洞府撞仙鐘邛墟起夕靄却見山下侶已
如迷世代問我何處來我來雲雨外

早冬遊王屋自靈都抵陽臺上方望天壇偶吟
成章寄溫谷周尊師中書李相公

唐
白居易

霜降山水清王屋十月時石泉碧漾漾巖樹紅離離朝
為靈都遊暮有陽臺期飄然世塵外鸞鶴如可追忽念
公程盡復慙身力衰天壇在天半欲上心遲遲嘗聞此
遊者隱客與損之各抱貴仙骨俱非泥垢姿二人相顧
言彼此稱男兒若不為松喬即須作皁纓今果如其語
光彩雙歲蕤一人佩金印一人翳玉芝我來高其事詠
歎偶成詩為君題石上欲使故山知

七言古

寄王屋山人孟大融

唐李 白

我昔東海上勞山餐紫霞親見安期公食棗大如瓜中
年謁漢主不愜還歸家朱顏謝春暉白髮見生涯所期
就金液飛步登雲車願隨夫子天壇上閒與仙人掃落
花

五言律

送家兄歸王屋山隱居

唐劉禹錫

洛陽天壇上依稀似玉京夜分先見日月淨遠聞笙雲

路將難犬丹臺有姓名古來成道者兄弟一同行

其二

春來山事好歸去亦逍遙水淨苔莎色露香芝朮苗登
臺吸瑞景飛步翼神飈願薦壘簾曲相將學玉簫

五言排律

王屋山天壇

明林鴻

名嶽推王屋孤標跨杳冥深窺砥柱黑高並太行青分
野連三晉風雲萃百靈鶴歸松已偃龍去水猶腥竈隱

燒丹火龕餘煉髓經羽人金磬動應此禮寒星

七言律

貞元二十年五月十四日夜宿天壇石幢側十
五日得整屋馬逢少府書知予遠上天壇因
以長句見贈篇末仍云靈谿試為訪金丹因
於壇上還贈

唐元稹

野人性僻窮深僻芸署官閒不似官萬里洞中朝玉帝
上有洞周
視萬里
九光霞外宿天壇洪漣浩渺東溟曙白日低

回上境寒因為南昌檢仙籍馬君家世奉還丹

宿王屋天壇

唐馬戴

星斗半沈蒼翠色紅霞遠照海濤分折松曉拂天壇雪
投簡寒窺玉洞雲絕頂樵迴人不見深林磬度鳥應聞
未知誰與傳金錄獨向仙祠拜老君

王屋道中

元耶律楚材

勝克河中號令齊神兵入自太行西昏昏煙鎖天壇暗
漠漠雲埋王屋低風軟却教冰泛水寒輕還使雪成泥

行吟想像覃懷景多少梅花坼玉谿

御定佩文齋詠物詩選卷七十一

欽定四庫全書

御定佩文齋詠物詩選卷七十二

終南山類

五言古

陪駕幸終南山

北周宇文昶

堯蓋臨河潁漢蹕踐華嵩日旂迴北鳳星旆轉南鴻青
雲過宣曲先驅背射熊金桴拂泉底玉琯吹雲中古轍
稱難極新途或易窮煙生山欲盡潭淨水恒空交松上

連霧修竹下來風仙才道無別靈氣法能同東棗羞朝
座西桃獻夜宮詔令王子晉出對浮丘公

陪駕幸終南山和宇文內史

北周 庾信

玉山乘四載瑤池宴八龍
黿橋浮少海鵠蓋上中峰
飛狐橫塞路白馬當河衝
水奠三川石山封五樹松
長虹雙瀑布圓闕雨芙蓉
成樓鳴夕鼓山寺響晨鐘
新蒲節轉促短筍籜猶重
樹宿含櫻鳥花留釀蜜蜂
迎風下列

缺灑酒召昌容且欣陪北上方欲待東封

登終南山

隋
胡師耽

結廬終南山西北望帝京煙霞亂鳥道俯見長安城宮
雉互相映雙闕雲間生鐘鼓沸閭闔笳吹咽承明朱閣
臨槐路紫蓋飛縱橫望望未極已甕牖秋風驚巖岫草
木黃飛鴈遺寒聲墜葉積幽徑繁露垂荒庭甕中酒新
熟澗谷寒蟲鳴且對一壺酒安知世間名寄言市朝客
同君樂太平

終南幽居獻蘇侍郎

唐 儲光義

中歲尚微道始知將谷神抗策還南山水木自相親深
林開一道青嶂成四鄰平明去採薇日入行刈薪雲歸
萬壑暗雪罷千巖春始看飢鳥來已見瑤華新寄言寒
芳者無乃後時人

其二

卜築青巖裏雲蘿四垂陰虛室若無人喬木自成林時
有清風至側聞樵採音鳳凰鳴高岡望望隔層岑既見

山路遠復道谿流深
倏仝空中遊虬龍水間吟
何當見輕翼為我達遠心

望終南山寄紫閣隱者

唐李白

出門見南山引領意無限
秀色難為名蒼翠日在眼
有時白雲起天際自舒卷
心中與之然託興每不淺
何當造幽人滅跡棲絕巘

登華嚴寺樓望終南山贈林校書兄弟

唐孟郊

地脊亞為崖脊出冥冥中樓根挿迴雲殿翼翔危空前
山胎元氣靈異生不窮勢吞萬象高秀奪五嶽雄一望
俗慮醒再登仙願崇青蓮三居士畫景真賞同

終南山下作

孟郊

見此原野秀始知造化偏山邨不假陰流水自雨田家
家梯碧峰門門鎖青煙因思蛻骨人化作飛桂仙

五言律

望終南山

唐太宗

重巒俯渭水，碧嶂插遙天。
出紅扶嶺日，入翠貯巖煙。
疊松朝若夜，複岫闕疑全。
對此恬千慮，無勞訪九仙。

賦終南山用風字韻應詔

唐楊師道

睿言懷隱逸，輟駕踐幽叢。
白雲飛夏雨，碧嶺橫春虹。
草綠長楊路，花疎五柞宮。
登臨日將晚，蘭桂起香風。

蓬萊三殿侍宴奉勅詠終南山應制

唐杜審言

北斗挂城邊，南山倚殿前。
雲標金闕迴，樹杪玉堂懸。
車

嶺通佳氣中峰繞瑞煙
小臣持獻壽長此戴堯天

終南山

唐王維

太乙近天都連山到海隅
白雲迴望合青靄入看無
分野中峰變陰晴衆壑殊
欲投人處宿隔水問樵夫

終南山

唐張喬

帶雪復銜春橫天占半秦
勢奇看不定景變寫難真
洞遠皆通嶽川多更有神
白雲幽絕處自古屬樵人

終南山

唐王貞白

千山凝黛色今古滿長安地去搜揚近人謀隱遁難水
穿諸苑過雪照一城寒為問紅塵裏誰同駐馬看

御定佩文齋詠物詩選卷七十二

欽定四庫全書

御定佩文齋詠物詩選卷七十二

龍門山類

五言古

過蜀龍門

唐
沈佺期

龍門非禹鑿詭怪乃天功
西南出巴峽不與衆山同
長竇亘五里宛轉復嵌空
伏湍煦潛石瀑布生輪風
流水無晝夜噴薄龍門中
潭河勢不測藻葩垂彩虹
我行當

李月煙景共春融江關勤亦甚巖壑意難窮
逝將息機事煉藥此山東

龍門山八詠

唐劉長卿

龍門

秋山日搖落秋水急波瀾獨見魚龍氣
長令煙雨寒誰窮造化力空向兩崖看

水東渡

山葉傍崖赤千峰秋色多夜泉發清響
寒渚生微波稍

待沙上月歸人爭渡河

福公塔

寂莫對伊水經行長未還東流自朝暮千載空雲山誰
見白鷗鳥無心洲渚間

遠公龕

松路向精舍花龕歸老僧閒雲隨錫杖落日低金繩入
夜翠微裏千峰明一燈

石樓

隱隱見花閣隔河映青林
水田秋鴈下山寺夜鐘深寂
寞羣動息風泉清道心

下山

誰識往來意孤雲長自閒
風寒未渡水日暮更看山
木落衆峰出龍宮蒼翠間

水西渡

伊水搖鏡光纖鱗如不隔
千龕道傍古一鳥沙上白
何事還山雲能留向城客

渡水

日暮下山來千山暮鐘發不知波上棹還弄山中月伊
水連白雲東南遠明滅

龍門

元表楠

蒼厓出雙闕羣山頽首尊陰風起晴雷摩蕩晝日昏鐵
峽擁偪仄百川為之奔疑下有龍湫逞怪蹲天門渾兮
出膚寸頃刻黃流渾側徑出石壁巨浸留遺痕緬昔設
天險事久難窮論征衣襲輕雨神君儼雲根

七言古

龍門應制

唐宋之問

宿雨霽氛埃，流雲度城闕。
河堤柳新翠，苑樹花先發。
洛陽花柳此時濃，山水樓臺映幾重。
羣公拂霧朝翔鳳，天子乘春幸鑿龍。
鑿龍近出王城外，羽從淋漓擁軒蓋。
雲蹕纔臨御水橋，天衣已入香山會。
山壁蘄巖斷復連，清流澄澈俯伊川。
塔影遙遙綠波上，星龕奕奕翠微邊。
層層巒崔嵬長千尋，木遠壑初飛萬丈泉。
綵仗紅旌繞香閣，下

輦登高望河洛東城宮闕擬昭回南陌滿塍殊綺錯林
下天香七寶臺山中有酒萬年杯微風一起祥花落仙
樂初鳴瑞鳥來鳥來花落紛無已稱觴獻壽香霞裏歌
舞淹留景欲斜石間猶駐五雲車鸞翼翼留芳草龍
騎駸駸映晚花千乘萬騎鑾輿出水靜山空嚴警蹕郊
外喧喧引看人傾都南望屬車塵罷聲引颺聞黃道王
氣周回入紫宸先王定鼎山河固寶命乘周萬物新吾
君不事瑤池樂時雨來觀農扈春

五言律

龍門

唐杜甫

龍門橫野斷驛樹出城來氣色皇居近金銀佛寺開往
來時屢改川陸日悠哉相閱征途上生涯盡幾回

龍門

元周伯琦

踰險夢頻悸循夷氣始渝千巖竒互獻萬壑勢爭趨峭
壁劒門壯重梁皇渚紆凡鱗期變化雷雨在斯須

五言排律

奉和春日遊龍門應制

唐武三思

鳳輦臨香地龍輿上翠微
星宮含雨氣月殿抱春暉
碧澗長虹下雕梁早燕歸
雲疑浮寶蓋石似拂天衣
露草侵階長風花繞席飛
日斜宸賞洽清吹入重闈

扈從度龍門

明王英

邊塞山川壯闕城地勢雄
崖傾開鳥道路險瞰龍宮
後隊千旗擁前驅一騎通
紆迴多傍澗登陟半凌空
雨霽巖前霧香飄樹杪風
雲隨仙仗白花映御衣
紅景屬陽和後恩覃化育
中臨高須刻石從此紀神功

欽定四庫全書

御定佩文齋詠物詩選
卷七十三

五

七言律

龍門

元馬祖常


萬壑奔流一峽開君王歲歲御龍來
人間塵土常相隔天上星辰到此迴
草木四時承午日風雲半夜束春雷
自慚曾奏長楊賦跋馬傍徨念暴鯁

龍門山中即事

明郊韶

雷雨過崖驚落湍空林白晝忽生寒
陰陰草閣開樽坐

細細山雲捲幔看落日樵聲經木末
青天鳥道挂簾端亦知吏隱非吾事
直欲從茲賦考槃



欽定四庫全書

御定佩文齋詠物詩選
卷七十三

六

御定佩文齋詠物詩選卷七十三